

# Mantegnair il princip voluntari

La regenza na vesa nagina necessitad per in'obligaziun areguard in servetsch da mediaziun

■ (anr/ac) **La regenza grischuna na vul betg obligar ils secturs da sanadad e social dad instradar in servetsch da mediaziun. En la resposta sin la dumonda da Renate Rutishauser (ps, Tumleastga) fa ella attent a la veglia dal cussegl grond da restar tar il princip voluntari.** En ina dumonda inoltrada a chaschun da la sessiun d'atun dal cussegl grond ha la deputada *Renate Rutishauser* (ps, Tumleastga) regurdà al chantun Vallais ch'haja instradà in servetsch da mediaziun per il sector da sanadad. In servetsch che pussibiliteschia a pazientas e pazients, ad abitantas ed abitants ed collavuraturas e collavurators sco als confamigliars da sa drizzar en situaziuns da conflict. La deputada menziuna ils posts da consultaziun e da recurs existents per part en singulas instituziuns che muntian in grond obstachel per ils collavurators era pervia da represius pussaivlas. La deputada ha vulì savair da la regenza co ch'ella valiteschia ils effects positivs dad in servetsch da mediaziun per l'entir sector social e da sa-

nadad en il chantun Grischun. Pitschens effects positivs vesa la regenza grischuna, sco ella scriva en sia resposta. La regenza

menziuna che la consultaziun tar la revisiun totala da la lescha da sanadad grischuna da l'onn 2015 nua che la propo-

sta dad obligar ils manaschis suttemess a la lubientscha da manaschi dal chantun da definir in servetsch da mediaziun ha-



ja chaschunà considerabla resistenza. Consequentamain hajan ins desistì da quella obligaziun, scriva la regenza. E regorda a la decisiun dal cussegl grond da stritgar l'obligaziun existenta vers las instituziuns da la tgira da vegls ed attempads en la debatta tar la revisiun da la lescha da sanadad l'onn 2016. Cun l'opiniun che la participaziun ad in servetsch da mediaziun duaja succeder voluntariamain. Uschia na vesa la regenza grischuna nagina necessitad dad introducir novs pass per realisar in servetsch da mediaziun. La regenza fa attent a la conferenza da l'Uniun grischuna dals spitals e da las chasas da tgira, a l'Uniun grischuna da spitex ed al Servetsch psichiatric grischun colliads cun il servetsch da mediaziun. Las ulteriuras instituziuns hajan era la pussaivladad da sa participar voluntariamain a quel servetsch. Per dispittas en connex cun il dretg da lavur porchian ils sindicats, las uniuns da persunal u schizunt l'inspecturat da lavur support, scriva la regenza grischuna en sia resposta.

**La regenza nun è da la medema opiniun pertutgant l'obligaziun per in servetsch da mediaziun per il sector social e da la sanadad sco la deputada Renate Rutishauser.** MAD